



Naalagaaffiit Peqatigiit Meeqqat pisinnaatitaaffii pillugit isumaqatigiissutaata malinneqarnissaanut iliuisissatut pilersaarummik 2023-mit 2030-mut atuuttusamik nutaamik Naalakkersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortaq Eqaluk Høegh, Inuit Ataqtigiit)

(Siullermeerneqarnera)

Nunatsinni meeqqat inuusuttullu kommunini tamani suliassangortitat annertuumik navianartorsiortutut nalunaarsorneqarsimallutik inissisimasut kiisalu meeqqat inuusuttullu immikkut annertusisamik iliuseqarnissaannik peqquneqarnissaannut Inatsisartut aalajangiiffigisassaattut siunnersuut.

(Inatsisartuni ilaasortaq, Eqaluk Høegh, Inuit Ataqtigiit)

(Siullermeerneqarnera)

Qujanaq Inatsisartuni ilaasortaq Eqaluk Høegh siunnersuutitut ukununnga, tamarmik inuiaqatigiittut qanoq meeqqatsinnik isumaginninnsinnut tunngassuteqartunut.

Qularutigineqassanngilaq, inuiaqatigiittut meeqqat atugarisaannut aammalu meeqqat tamarmik pitsaasumik meeraanissamut pisinnaatitaaffeqarnerannut, suli unaminartorpassuarnik peqartugut. Meeqqat amerlavallaat, nererusullutik innartarput. Meeqqat amerlavallaat, kinguaassiuutitigut atornerlunneqartarput. Meeqqat amerlavallaat, meeqqat atuarfianniit soraarummeertanngillat. Meeqqat amerlavallaat, atornerluisunik angajoqqaarlutik peroriartortarput. Meeqqat amerlavallaat, angajoqqaaminnit arsaarinnissutaasarput. Meeqqat amerlavallaat, imminnut toquttarput.

Allatut oqaatigalugu, meeqqanut tunngasuni ajornartorsiuterpassuaqarpoq, taamaattumillu suli suliassaqaqaagut.

Meeqqat meeqqallu inuunerinnissaat ukiorpassuarni politikikkut pingaartinneqaaq. Maani Inatsisartuni tamatta pingaartitarput. Tamatta meeqqatsinnut aammalu allanut meeqqanut inuuneq pitsaanerpaaq kissaatigaarput. Soorliuna, meeqqat atugaannut tunngasuni unaminartoqartuortoq? Immaqa allatut iliorutta ajunnginnerussagaluortoq?

Ataaserli ilumoorpoq; allatut ajornartumik meeqqat meeqqallu atugaat politikikkut suliassani pingaarnepaatittuartaqarpagut. Ukkatarineqarnerat allamut nuussanngilarput, taama ajornartorsiut annertutigitillugu.

Taakku siunnersuutit marluk Inatsisartuni ilaasortamit Eqaluk Høegh-imi tapersersornarlunnartuupput, aamma Naalakkersuisut allannguutissatut siunnersuutaat taamaappoq. Tamaasa Inatsisartut Ilaqutariinnermut- aamma Peqqissutsimut ataatsimiititaliaanni suliareqqitassatut innersuussutigineqarput.



Siunnersuutilli qalliinnarsiortumik ilisimatoorpalaartumillu allataallutik. Pilersaarutit sulianillu suliaqarneq pivarput. Kommunit, kattuffiit, partiit, Inatsisartut allallu suliniarnermi peqataatinnegassasut.

Meeqqammi? Angajoqqaammi? Kia taakku peqataatissavai? Demokraatit kissaatigigaluarpaat, pineqartut maannamiit annertunerusumik peqataatinnegarnissaat. Taamaattumik Ilaqutariinnermut- aamma Peqqissutsimut ataatsimiititaliaq kajumissaarusupparput ataatsimiititaliami suliarineqarnerani tamanna isiginiqqullugu.

Allatut eqqarsartariaqarpugut. Ajoraluartumik paasisariaqarparput, ukiorpassuarni kingullerni suliniutit naammassimanngitsut. Paatsoorniaqinasinga; Siunertat pitsaasusimapput, ilmoortumilli oqassaguma tamatta neriussimagunaraluarpugut, inerneru pitsaanerussasut.